

● **Заман талабы**

Жаңа мамандықтарға сұраныс артып келеді

Біздің мемлекет үшін ауыл шаруашылығы саласының маңызы зор. Мемлекет басшысы Қасым-Жомарт Тоқаев биылғы Жолдауында бұл мәселеге кеңінен тоқталды. Иә, бұл саланы дамыту жолында білікті кадрлардың орны бөлек.

Біздің оқу орнымыз біраз жылдардан бері ауыл шаруашылығы мамандарын даярлау жұмысын жүйелі жүргізіп келеді. Биыл өлімізде қуаңшылық болып, мал азығын дайындауда біраз қиындықтар орын алды. Шаруаны қуаңшылық қысып тұрғанда жүздеген гектар жерді қоршап алып, мал азығына деген сұранысты тіпті ұшындырып жібергендер болды. Мемлекет басшысы өз Жолдауында бұл мәселеге де арнайы тоқталды. Рас, қазір мал жаятын жерге шаруалардың қолы жетпей жүр. Өйткені, мұндай алқаптарды бүгінде шынжыр балақ, шұбар төстер иеленіп алған. Өкімдер түрлі себептерді көлденең тартып, ықпалды адамдардың ығына жығылып, бұл мәселені шеше алмай отыр.

Мал басының амандығы ең алдымен ветеринар мамандардың жүйелі жұмысына да байланысты. Бұл түптеп келгенде, ауылдағы ағайынның әл-ауқатына тікелей әсер етеді. Ветеринария қызметі қазіргі заман талабына сай болмай, ауыл шаруашылығы өнімдерінің экспортын арттыру мүмкін емес. Өз саласын жетік білетін білікті басшылармен тәжірибелі мамандар тізе қосып қимылдағанда ғана бұл тығырықтан шығар жол таба алады. Демек, бұл жерде де мәселе кадрға келіп тіреледі. Міне, осы міндеттерді жүзеге асыруда өліміздегі іргелі оқу ордаларының бірі саналатын М.Өуезов атындағы университеттің атқарып отырған қызметі зор. Оның ішінде аграрлық факультет жұмысын ерекше атап айтуға тұрарлық.

Жалпы, өңіріміздегі ауыл шаруашылығы мамандарының мектебі заман талабына сай жылда жетілдіріліп келеді. Осы уақытқа дейін факультетте «жерге орналастыру», «аграрлық техника және технология», «кадастр», «су ресурстарын және суды пайдалану», «агрономия», «топырақтану және агрохимия», «мал шаруашылығы өнімдерін өндіру технологиясы» және «ветеринариялық-медицина» мамандықтары бойынша мамандар даярланып келсе, өткен жылдан бастап бүгінгі уақыт талабына сай жаңадан «сүмен қамтамасыз ету, суды бұру және су ресурстарын қорғау», «өсімдік қорғау және карантин», «жеміс, көкөніс шаруашылығы», «орман шаруашылығын қорғау және карантин» сияқты қосымша төрт мамандық қосылып, факультет бойынша мамандықтар саны он екіге жетті.



Мұнда болашақ мамандар теорияны практикамен ұштастыру үшін дала жұмыстарына да ерте араласады. Білім ордасының меншігінде Түлкібас ауданы «Жаскөшу» ауылында үлкен оқу-өндірістік кешені бар. Бұл кешенде 18 жылқы, 28 ірі қара өсірілуде. Бұл малға білім алушылардың өздері қарайды. Сондай-ақ, елу гектар егістік жері бар. Қала іргесіндегі «Қайнарбұлақ» елді мекеніндегі 2,8 гектар алқап та білім алушылардың игілігіне жұмыс істейді. Студенттердің тәжірибесін нығайту мақсатында Түлкібас ауданындағы «Кентау» шаруа қожалығымен келісімшартқа отырып, біздің студенттер жыл сайын жиын-төрім науқанына қатысады.

Түркістан облысында мал шаруашылығымен айналысатын бірнеше ірі агроқұрылымдар бар. Мысалы түйе шаруашылығымен айналысатын 13 агроқұрылымда төрт мыңнан астам Ойсылқара тұқымы бар, олардың 1918-і інген. Ал, 17 ірі шаруа қожалықта 6033 жылқы болса, оның 2725-сі аналық. Мал бордақылайтын ірі агроқұрылымдар саны да жыл өткен сайын көбейіп келеді. Бүгінде 25 құрылымның жалпы сиымдылығы 30 мың ірі қараға арналған.

Өзіміздің жыл сайынғы жүргізілген деректеріміз бойынша біздің түлектеріміздің 90 пайыздан астамы білім алған мамандықтары бойынша жұмысқа орналасады. Бұл – біз үшін үлкен жетістік. Алдағы уақытта бұл көрсеткішті одан әрі еселей түсеміз деген сенім бар. Қазіргі таңда факультетімізде үш ірі кафедра бар, тек күндізгі бөлімнің өзінде 1200-ге жуық, ал, қашықтан оқитын бөлімде 500-ден астам студент білім алып жүр. Оларға жүзге жуық оқытушы-профессор дәріс береді.

Мемлекет басшысының ауыл шаруашылығын дамыту мақсатындағы бастамаларына біз осылайша үн қатып, Жолдау жүктеген міндеттерге қал-қадірімізше қолдау білдіріп келеміз.

Гүлмира ЕЛІБАЕВА,
М.Өуезов атындағы ОҚУ-дің
аграрлық факультетінің деканы.